

**INATSIARTUT
OMBUDSMANDIATA
UKIUMOORTUMIK
NALUNAARUTAA
2010**

6. Suliat nalinginnaasumik soqutiginaatillit, inatsiseqartitsiffiusunut agguataakkat

Tunnngaviusut ingerlatsinermilu ileqqorissaarneq

6.5 Meeqqanik inuusuttunillu ikiorsiisarneq pillugu Inatsisartut peq-qussutaat tunnngavigalugu suliamik suliarinninnermi kukkunerit arlallit

A-p inooqataatalu ikiorneqarnissamik saaffiginnissummik, matumani A-p inooqataata paniata ilaqutariinnik katsorsaannermi peqataatinneqarnissaa ilanngullugu eqqarsaatigalugu, K Kommunimit suliarineqarnera naammagittaalliuutigaat.

Ombudsmandi kommunip suliamik suliarinninnera arlalitsigut isornar-torsiorlugu oqaaseqaateqarpoq:

Siullertut A-p inooqataatalu saaffiginnissutaat siulleq kommunip malit-seqartitsivigisimanngilaa. Aappaattut A inooqamminut suliami illua'-tungiusumut ilumut sinniisuuneranik misissuinissani kommunip sumigin-narsimavaa. Pingajuattut kommunip ilaqutariinnik katsorsaannermi pe-qataatitsiumaneq oqaasiinnartigut itigartitsissutigisimavaa, A naamma-gittaalliornissamut periarfissamik aamma allakkatigut tunngavilersuiffi-gineqarsinnaatitaanerani ilitsersornagu. Sisamaattut kommunip sulia-mik uppernarsaasersuina amigarpoq (j.nr. 2009-106-0001).

Inooqammi paniata D-p ilaqutariinnik katsorsaannermi ilaatinneqarnissamik pisa-riaqartitsinera pillugu saaffiginnissutimi K Kommunimit akineqartarsimanngin-nerannik A-p naammagittaalliutaa 31. juli 2007-imi tiguara.

D eqqarsaatigalugu kommunip suliamik suliarinninnera pillugu apeqqummi A-p sinniisuuffigisinnaagaani A-p inooqataata nalunaarutaa 18. november 2009-mi tiguara.

Suliami makku pineqarput:

A-p inooqataa A-lu K Kommunimi isumaginninnermik ingerlatsivimmut 18. maj 2006-imi imatut allapput:

"D-mut atatillugu allagaqaqusaagatta.

1. marts nunaqarfimmiit utermat suliniutit arlallit sulissutigilerpagut. D meeraavoq 13-inik ukiulik isikkumigullu inersimalluni. Nalunaarutigissuara D naalanngittuunngilaq, D-li malugeqquvoq namminermini ajortoqarmat ajornartorsiutinik anigunngittoorsi-masaminik, soorlu qanigisani perorfiginikuusani toqukkut annaavaa. Isumagineqar-neq, isumassorneqarneq, asaneqarneq, illersorneqarneq, paarineqarnerlu meeqqap mi-kinermiit annaasaasa ilagaat. Tatigineqarneq, ataqqineqarneq naleqarnerlu annaasa-risimavai. Kinguaassiutikkut kannguttaatsuliorfigineqarsimaneranut ersiutaapput ersi-sarneq, annilaanganeq, qununeq, merserinneq, aliasunneq, nikallunganeq, kanngu-sunneq, ajukkunneq peqqusiileqineq. D nalaataqarnerlunnini aallaavigalugu erloqiga-mi artorsarluni ilumini ilaartornikuugami imaannaanngittunik nanertisimanerminik i-sumaqannginneq anniaatini pillugit ussarnartorsiorluni imminornissaminut. Kamaqa-rami pooqqalluni isumaluttarluni, tupinnanngilaq kingusinaarluni nalaataqarnerlunneri peqqutaallutik paatsiveeroqqalluni paatsuungagami anniarami tarnimigut ikini anner-tummat pupatiiterlunilu ineriartorpoq, eqqoruminaappoq. D alloriarpoq uatsinni taper-

6. *Suliat nalinginnaasumik soqutiginaatillit, inatsiseqartitsiffiusunut agguataakkat*

sersorlugu ullaakkut nammineq makinneq itersartittartinnikuugakku, qaqugumut ilinniarluni suliffeqalerunilu ullaakkut nammineq makittalernissani ilinniarpaa ilikkarlugulu. Timini eqqiarlugu, kaammattorlugu qanoq pingaartigisoq eqqiarneq, uatsinnut oqaatigisinnaanngisani allalluni tunniussilluni kingornalu inuttaalu eqqartorlugu tati-galunga annissiffigimmanga pikkorigalugu qujaffigalugulu iluaqutigeqaarput. D-p inersimavallaarnera meeqqatut eqqarsarnissaa meeqqatullu pinnguarnissaa meeqqallu silarsuaanniinnissaa qanoriliuseqarpugut, inissaqartillugu attavigalugu atassuteqarnik-kut pipput piffissarlu annertuneq meeraanissaanut ilinniagassaanullu peqatini naligi-niarlugit anguniarpagut, inuttaa ippingiatoqaaq.

Nalorsartarnerarluni anguniagaqarneq killiliineq naaggaarsinnaaneq nunaqarfimmiik-kallarmalli ilinniartillugu aallartippoq. Ineriartorneq, inuunerup aamma timip naleqar-nera, sulineq imaannaanngittaqaq. Meeraalluni meeqqap pisariaqartitai pinngitsoorsi-magaanni inerisimasuunitsinni inoqatitsinnut uannullu piumasaqaatigut pissarsiarini-arlugit uannit malugineqartuarnissani isumagineqartuarnissaq paarineqartuarnissaq il-lersorneqartuarnissaq ilumoortumik tusarnaarneqartuarnissaq pisariaqartitai assigiin-ngitsut saqqummertarput inunnut allanut attaveqarnerminik pakatsissuteqartuarnini aamma kukkuneqanngilluinnartumik ujaasiuarneq pisariaqartitaminik tamanik tunisi-sinnaasumik arlaatigut atonerluineq soorlu pisiniartuarnikkut nerinikkut oorilerineq atisanullu qimaaneq. Pisariaqartinnerpaasani pisinnaannginnamiuk tamakkunatigut pi-niartarlugu. D-p aamma annaanikuuaa kinaassutsini, kinguaassiuutitigut atonerlunne-qarnikuugami, imminut pisuutinneq misigissusaavoq annernarnerpaaq, pequtugalugu kinaassuseeruttarpugut, taamaalilluni imminut ajortuliortup kinaassusaa tigullugu. D-p ilumini pigisarpai inerisimannginneq, amerlasuutigut imaqanngitsuusineq misigisa-mi aammalu qanoq misiginerluni nalorsartarluni, kingunerisarpaa nikallungarujussuar-neq kinguneralu imminuinnaq eqqarsaatigaluni, suna tamarmi uangannguakkuluk nal-linnartunga tusaasinga. D-p inuunermini annaasaqarnermi toqukkut qimataanissani an-nilaangangaa aamma uannit qanippallaarneqarnissaminut ersissuteqarpoq qimanne-qarnissaminik uannit ersissutigalugu. Ilumoorpoq D ersisarpoq. Timikkullu sukanga-soorneq, issannguneq uummamillu tilleruluttoorneq, inuummarlulluni niaqorluttar-poq tarnikkut annilaanganeq, eqqarsarsinnaaneq ajornakusooqqajaasarpoq = saperpara imminullu aqussinajunnaavippunga = nikallornerujussuarmik imminullu pisuutin-neq takkuteqqissinnaaneramik ilerasuuteqarluni. D tapersorsorparput, attavigalugu i-kiorparput ikorfartorlugu. Tassuuna alloriarnera takussutissaqarpoq. amingaatigini-kuuai toqqammaveqarneq, isumagineqarluni paarineqarluni innaqatigineqartarneq qi-nunerlu. Atuffanneqartarnikkut pinginnaaneqarfialu tussiarneq inissaqartinneqarluni i-nuttaanut allissutaasaqaat. Meeqqallu pisariaqartitai illersorneqarluni asanninnermillu, isumai misigissutsinilu suungaluartut akuerineqarluni misigitinneqarluni tunineqarluni. Immitsinnut piumaffiginikuuvugut D-mut tunngatillugu iliuseqarpugut. Imaan-naanngeqaaq oqimaallunilu, ajornaatsuinnaanngittaqaq, nuanniitsut nuannersullu ta-maasa aqqusaartarpagut, aporfissaqaraluaangattaluunniit anguniakkavut arriikkalu-artumik ingerlappagut. Qularutiginngilara D-p nanertuutini saqqummiussuinermini naalliunnartut misigissutsini oqaasertaliisalernerminut ammaallugit artornartut sak-

kortuut allannikkut avitseqatigiittarnikkullu isumakkeerfiginninnikkut iparartalernikuugai. Sungiutsikkuminaatsinnikuullugillu allassaqaarluni aallaqqaammut aliasunneq kamannerlu tulleriaattaleramigit allassaqqaqaaq. Iluaqutaapput, kanngugisaminik eqqartuisalerpoq aallaqqaammut maannamullu annikittunnguamik, uannullu ilinriarfiuvoq. Sakkussannik tunioraavoq D-mullu toqqortikkani iliuseqarpoq, pikkorip-poq nuannaarutigisaminik. D-una timikkut tarnimigullu inuunikkullu ajoqusersimagama ajornartorsiortoq, paarisaanikkut nalaataqarnerlunninilu ilaqutariinnilu inissisimamerminik pissutaallutik annaasaminullu aallaaviusut taamaannerannut D-mut."

A K Kommunimut 28. august 2006-imi imatut allappoq:

"Allagaqarpunga D (inuttut normua) Qaqiffimmut katsorsartinnissamik (familiebehandlungimut) pisariaqartitsivoq maannakkut inisseqqanermini nalaatat artornartut anaasaqarnerilu nalaataqarnerlu killiffiani inuunera oqimaammat.

Maannakkullu pisariaqartitani takorloorsimavai inuunini qanoq iliuseqarfigalugu timitalerlungu familiehandlingernissani, misigissutsini suliarilernissai qamuuna imaa-jarlunilu sakkussaminillu ilisimasagalernissaa.

Naatsunnguugaluartumik qinnuteqarpunga, neriuppunga paasinnillusi qinnuteqaat tigulluarumaarissi, sulilluarisilu.

Qinnuteqaat akuerineqassappat tapersersuisutut ilagerusuppara."

A Isumaginninnermi Naammagittaalliuuteqartarfimmut 13. februar 2007-imi imatut allappoq:

"Ataani atsiortunga K Kommunimi isumaginninnermik ingerlatsivimmut kiisalu [nunaqarfi]mimi nunaqarfiup allaffianut inooqatima meerarsiaa D, inuttut normua (...), pillugu arlaleriarlunga saaffiginnittarsimagaluarpunga, taakkunanngali akineqassananga.

Atuarfik nakorsallu assigiinngitsut K Kommunimi isumaginninnermik ingerlatsivimmut D ulluinnarni pitsaannngitsumik pinera pillugu saaffiginnittarsimagaluarput taperiissutitullu allagaqarsimagaluarlutik, akineqartarsimanatilli.

D-p ajornartorsiutai kinguaassiuutitigut atonerlunneqarsimaneranik kingusinnerusukkullu kinguaassiuutitigut innimiilliorfigineqarsimaneranik tunngaveqarput, suliarlu politiinut nalunaarutigineqarsimagaluarluni, politiilli atonerluisoq kingusinnerusukkut unnerluutigisinnaasimannngilaat, uppernarsaatissaqannginnera pissutigalugu. Tamanna immi pitsaannngitsorujussuuvoq, tassami D isumaqalersimammat allanit upperineqarani kiisalu isumaqarsimalluni nammineq ikiorneqarani allat tamarmik kisimik ikiorneqartut.

6. *Suliat nalinginnaasumik soqutiginaatillit, inatsiseqartitsiffiusunut agguataakkat*

D nammineq ikioqqulluni arlaleriarluni suaartarsimagaluarpoq, atuarfimmit isumaginninnermillu ingerlatsivimmit qisuariarfigineqarani, tamannalu pissutigalugu allanik tatiginnikkunnaarsimalluni.

D-p kinguaassiuutitigut atonerlunneqarsimaneranut takussutissaqarpoq, ulluinnarnili inuunermini namminiilersinnaanissaanut K Kommuni pisariaqartumik iliuuseqanngitsoorsimalluni.

Ataani atsiortunga nunaqarfiup allaffianut K-Ilu Kommunianut aamma saaffiginnipunga D ikiortissarsiorlugu kiisalu suliami allagaatinik paasitinneqarumasimallunga, paasitinneqarlungalali suliami allagaatit tammarsimasut??? Ataanilu atsiortunga paasitinneqarlunga suliami allattuisoqarneq ajortoq, suut tamaasa eqqaamasinnaagamikit???

Ataatigut atsiortunga isumaqarpunga D ingerlariaqqinnissaminut ikiorneqartariaqartoq, alianartullu aqquasaarsimasami suliarinissaanut ikiorneqartariaqarluni, ataanimi atsiortup nalunngilaa D (...) -mut Ilaqutariinnillu Katsorsaavimmut innersuunneqarsimagaluartoq, tamannali piviusunngortinneqarsimanngitsoq.

D-p alianartut aqquasaarsimasani suliarinissaanut ikiorneqarnissamik pisariaqartitsisoq qularutissaanngilaq, isumaqarpungalu meeqqap ikiorneqarnissaa taama ajornartigisussaanngitsoq, tassami meeqqanik inuusuttunillu ikiorsiisarneq pillugu Inatsisartut peqqussutaanni nr. 1-imi, 15. april 2003-meersumi imaattunik allassimasoqar-

mat:

"§ 1. (...)

§ 4. (...)

§ 6 (...)

§ 7 (...)

§ 8 (...)

§ 9. (...)"

Malittarisassat meeqqap qitiutinneqarnissaanik aalajangersaasut K Kommunip ilumut malissimanerai ataani atsiortunga qularutigisorujussuuvata.

Ataani atsiortunga suliami tassani allakkatigut aalajangiisoqarnissaa/akissuteqartoqarnissaa piumasaraara, ilaqutariimmi saaffiginnissuterpasuarminnut siusinnerusukut allakkatigut akineqartarsimanngimmata.

D ikiorniarlugu iliuuseqartoqanngippat ataani atsiortunga Isumaginninnermi Naamagittaalliuuteqartarfimmut naamagittaalliorniarpunga, pisariaqarpallu K Kommuni meeqqamik alianartumik nalaataqarsimanini pissutigalugu ikioqqulluni ukiorpassuarini suaartarsimasumik K Kommunip qisuariarfigisimanngisaanik sumiginnaasutut un-

nerluutiginiarlugu, aamma meeqqat ilaquataasaluunniit ikiorneqarnissaannik neqeroo-
ruteqarsimanginnera eqqarsaatigalugu.

Allakkat K Kommunimut nassiunneqarsimasunut ilaannut ilanngussat ilanngullugit
nassiuppakka." (Atorfeqarfimmi nutsigaavoq)

A-p naammagittaalliuutaa Naammagittaalliuuteqartarfiup uannut 10. april 2007-
imi ingerlateqqillugu nassiuppaa, imaattunik oqaaseqaateqarluni:

"Naammagittaalliuut Isumaginninnermi Naammagittaalliuuteqartarfiup Inatsisartut
Ombudsmandiannut ingerlateqqillugu matumuuna nassiuppaa.

K Kommunip suliamik suliarinninnera A-p inooqatimi panissiaa D sinnerlugu naam-
magittaalliuutigaa.

D kinguaassiuutitigut atonerlunneqarsimavoq, tamatumalu kingunerisaanik ikiorne-
qarnissani pisariaqartillugu. Inuit assigiinngitsut, matumani D-p atuarfiani pisorta-
q ilanngullugu eqqarsaatigalugu, K Kommunimut saaffiginnittarsimapput, kommunip
akissuteqarfigisimangisaanik.

A suliami illua'tungiusutut inissisimangilaq, taamaattumillu naammagittaalliorsin-
naatitaanani. Naammagittaalliuuteqartarfik naliliivoq D ikiorneqarnissamik pisaria-
qartitsilluni nammineq allassimammat naammagittaalliuut D-p naammagittaalliuutaa-
tut isigineqarsinnaavoq.

K Kommuni suliami aalajangiisimangimmat naammagittaalliuut suliamik suliarin-
ninnermut namminermut tunngasoq Naammagittaalliuuteqartarfiup suliarisinnaangi-
laa.

Naammagittaalliuut Naammagittaalliuuteqartarfiup Inatsisartut Ombudsmandiannut
ingerlateqqillugu nassiuppaa, Naammagittaalliuuteqartarfimmi isumaqarmat Inatsisar-
tut Ombudsmandiat tassaasoq suliamik suliarinnittussaq eqqortoq, kiisalu suliap ilu-
ngersunartuunera pissutigalugu." (Atorfeqarfimmi nutsigaavoq)

Isumaginninnermi Naammagittaalliuuteqartarfimmut 13. april 2007-imi imatut
allappunga:

"A-p Isumaginninnermi Naammagittaalliuuteqartarfimmut naammagittaalliuutaa ilan-
ngussartalik Ombudsmandip Isumaginninnermi Naammagittaalliuuteqartarfimmit ti-
guaa.

Suliami paasissutissanit tiguneqartunit erserpoq A-p inooqatimi panissiaanut D-mut,
inuttut normua (...), ikiorsiiniutinik K Kommunip D ikiorneqarnissaminik pisariaqar-

6. Suliat nalinginnaasumik soqutiginaatillit, inatsiseqartitsiffiusunut agguataakkat

titsisoq arlaleriarluni saaffigineqartaraluarluni aallartitsisimannginnera A-p Naammagittaalliuuteqartarfimmut naammagittaalliuutigisimagaa.

Suliap suliarineqarnissaa Naammagittaalliuuteqartarfiup itigartitsissutigisimavaa, kommuni naammagittaalliuutiginarsinnaasumik aalajangiisimanngimmat.

Inatsisartut Ombudsmandiat pillugu Inatsisartut inatsisaanni § 6, imm. 3-kkut aalajangersarneqarpoq aalajangiinerit allaffissornikkut aqutsinermi oqartussaasumit qulliu nerusumit allanngortinneqarsinnaasut pillugit naammagittaalliuutit Ombudsmandip suliarisinnaanngikkai.

Aalajangersagaq taanna tunngaviusumik isummap matuma erserneraa, tassalu ingerlatsiviup innuttaasullu akornanni aqqiagiinngissutit ingerlatsiviup iluani aqqinniarneqaqqaartariaqartut, Ombudsmandip avataanit nakkutilliisuusup suliamut akuliutsin neqannginnerani.

Tamatumunnga peqatigitillugu pineqartoq tassaavoq A-p Ombudsmandimut naammagittaalliorinissaminik kissaateqarnerata naammagittaalliummi Naammagittaalliuuteqartarfiup uannut nassiussaani takuneqarsinnaannginnera.

Tamatuma saniatigut oqaatigaara Inatsisartut Ombudsmandiat pillugu Inatsisartut inatsisaanni § 6, imm. 3-mi malittarisassap manna nassatarigaa, tassalu Isumaginninnermi Naammagittaalliuuteqartarfik suliami aalajangiisimatinnagu piffissaq kommunip suliamik suliarinninnermut atugaa apequtinillu allanik kommunip ikiorsiiniutinik aallartitsinissamut pisussaaffeqarsimaneranik aalajangiinnermut pingaaruteqanngitsunik peqarpat taamaallaat taakkuninnga Ombudsmandip isummerfiginnissinnaanera.

Tamanna tunngavigalugu manna eqqornerpaasutut isigaara, tassalu A Ombudsmandimut naammagittaalliorinissaminik kissaateqarnerasoq qulaajarniarlugu A-mut saaffigininnissamut tunngavissaqarsinnaanersoq isumminnginninni Ilaqutariinnermut Pisortaqarfik isumaginninnermut tunngasuni nakkutilliinermi oqartussaasoq, tak. isumaginnittoqarfiup aqunneqarnera aqqissuussaaneralu pillugit Inatsisartut inatsisaanni § 1, imm. 1, qinnuigineqassasoq pissutsit Naammagittaalliuuteqartarfimmut naammagittaalliummi pineqartut pisortaqarfiup misissussanera nalileeqqullugu.

Taamaattumik allakkat ukua suliamilu allagaatit Naammagittaalliuuteqartarfiup uannut nassiussaasa assilineri Ilaqutariinnermut Pisortaqarfimmut nassiuppakka.

Allakkat ukua assilinerat A-mut matumunnga peqatigitillugit nassiuppara.

Ilaqutariinnermut Pisortaqarfiup akissutaa tigugukku suliaq uanga annertunerusumik iliuseqarnissannut pissutissaqalersitsinersoq Naammagittaalliuuteqartarfimmut ilisimatitsissutiginiarpara."

Ilaqutariinnermut Pisortaqarfik tamatumunnga peqatigitillugu imatut allaffigaa-
ra:

"A-p Isumaginninnermi Naammagittaalliuuteqartarfimmut naammagittaalliuutaa arla-
linnik ilanngussartalik Ombudsmandip Isumaginninnermi Naammagittaalliuuteqartar-
fimmit tiguua, ilanngussallu ilaat Naammagittaalliuuteqartarfiup kalaallisuumit qallu-
naatumut nutsersimavai. Paasissutissat taakkua assilineri ilanngullugit nassiuppakka.

Allakkanut ukununnga peqatigitillugit Naammagittaalliuuteqartarfik allakkatigut na-
lunaarfigaara suliaq paasissutissat pigineqartut tunngavigalugit Ombudsmandip sulia-
risinnaanngikkaa. Naammagittaalliuuteqartarfimmut allakkama assilinerat ilanngul-
lugu aamma nassiuppara.

A Ombudsmandimut naammagittaalliorniarnersoq misissussanerlugu isumminngin-
ninni Ilaqutariinnermut Pisortaqarfik qinnuigaara suliaq pisortaqarfiup isumaginnin-
nermut tunngasuni nakkutilliinnermut oqartussaasutut suliarilissaneraa nalileeqqullugu.

Allakkat ukua assilinerat A-mut nassiuppara."

A-p naammagittaalliuutaata Isumaginninnermi Naammagittaalliuuteqartarfiup
uannut nassiussimasaata assilineri Naalagaaffiup Kalaallit Nunaanni Sinniisaanit
16. april 2007-imi tiguara. Naalagaaffiup Sinniisaata allagaanit nassitsissummik
erserpoq allakkat taakku A-p Naalagaaffiup Sinniisaanut aamma nassiussimagai.

Ilaqutariinnermut Pisortaqarfiup akissutaa imaattoq 23. maj 2007-imi tiguara:

"Ilaqutariinnermut Pisortaqarfik Pisortaqarfiup isumaginninnermut tunngasunik nak-
kutilliinera pillugu Inatsisartut Ombudsmandiannit apeqqummik 16. april 2007-imi ti-
gusaqarpoq.

Ilaqutariinnermut Pisortaqarfimmit isumaqartoqarpoq A Isumaginninnermi Naamma-
gittaalliuuteqartarfimmut saaffiginninnermini suliap arriippallaamik suliarineqarnera
naammagittaalliuutigigaa.

Ilaqutariinnermut Pisortaqarfimmit taamatut isumaqartoqarnera naammagittaalliuute-
qartarfiup aalajangiisoqarsimannginnera pissutigalugu naammagittaalliuutip itigartit-
sissutigineqarnissaanik aalajangiineratigut ilalerneqarpoq.

Ilaqutariinnermut Pisortaqarfiup nakkutilliisussaatitaanera kommunini isumaginnin-
nermi malittarisassat malinneqarnerannik aqunneqarnerannillu nalinginnaasumik nak-
kutilliinermik imaqarpoq. Suliap matumani pisutut Ilaqutariinnermut Pisortaqarfim-
mut saqqummiunneqarnerani iliuuseqaqqinnissaq pisariaqanngilaq. Suliani aalaja-

6. Suliat nalinginnaasumik soqutiginaatillit, inatsiseqartitsiffiusunut agguataakkat

ngersimasuni suliat arriippallaamik suliarineqarnerat suliarineqannginneralluunniit pillugit naammagittaalliuutit Ombudsmandip suliassaanut ilaaginnarput taamaattumilu suliaq eqqortumik Ombudsmandimit suliarineqarsinnaalluni."

A-mut 13. juni 2007-imi imatut allappunga:

"Isumaginninnermi Naammagittaalliuuteqartarfimmut Ilaqutariissutsimullu Pisortaqarfimmut allakkakka 13. april 2007-imeersut assilineri ilinnut nassiunniukuusannut tunngasoq suliaq maanna uterfigaara.

16. april 2007-imi Naalagaaffiup sinniisuanit allakkanit Naalagaaffiup sinniisuanut nassiussimasarnik nassinneqarpunga. Naalagaaffiup sinniisuanut allakkat naammagittaalliuuteqartarfimmut naammagittaalliuutivit assigai.

Ilanngullugu Ilaqutariissutsimut Pisortaqarfimmit suliame paasissutissat tunngavigalugit suliamek suliarinninnissamik tunngavissaqannginnerarluni isumaqartumik akisummik 24. maj 2007-imeersumik tigusaqarpunga.

Tamatuma kingorna suliaq suliarilissanerlugu isumaliutersuutigaara.

Taamaaliornissannulli piumasaqaataassaaq Isumaginninnermi Naammagittaalliuuteqartarfimmut Naalagaaffiullu sinniisuanut allakkatit aamma Inatsisartut Ombudsmandiannut naammagittaalliuutigerusunneritit nalunaarfigissagimma, tassami Inatsisartut Ombudsmandiat, pisortat ingerlatsiviisa avataanni nakkutilliisuusoq, suliassat allaffissornikkut oqartussaasunit piumaffigineqarnermigut suliarinnissinnaanngimmat.

Inatsisartut Ombudsmandiannut naammagittaalliorniartutit kissaateqarlutit nalunaarfigigumma, D-p ikiorserneqarnissaa pillugu saaffiginnissutivit kommunimit akineqarsimannginnera misissussallugu piareersimajumaarpunga.

Ullumimiit sapaatit akunneri arfinillit iluanni tusarfiginngikkukit imatut paasissavara kommunip saaffiginnissutinnut akissuteqannginnera Inatsisartut Ombudsmandiannut naammagittaalliuutiginiangikkat, taamaattoqassappallu suliaq annerusumik iliuseqarnanga naammassissavara.

Tassunga atatillugu oqaatigaara Inatsisartut Ombudsmandiata kommunip D-mut ikiorseerusussimannginnera pillugu naammagittaalliuut suliarisinnaanngikkaa, tassami kommunip ikiorseerusussimannginneranut aalajangiineq Isumaginninnermi Naammagittaalliuuteqartarfimmut naammagittaalliuutigineqarsinnaammat. Tamatuma kinguneraa Inatsisartut Ombudsmandiat pillugu Inatsisartut inatsisaanni § 6, imm. 3-kkut aalajangersarneqarpoq aalajangiinerit allaffissornikkut oqartussaasumit qulliunerusumit allanngortinneqarsinnaasut pillugit naammagittaalliuutit Inatsisartut Ombuds-

mandiata suliarisinnaangimmagit, oqartussaasoq qulliunerusoq taanna suliami aalajangeereersimatinnagu.

Isumaqaruit kommuni A-mut ikiorsiinissaminut itigartitsisimasoq Isumaginninnermi Naammagittaalliuuteqartarfimmut aammaarlutit saaffiginnissutigissagit siunnersuuti-gaara. Suliami kommunip aalajangiisimaneranut paasissutissanik peqaruit Isumagin-ninnermi Naammagittaalliuuteqartarfiup suliaq qaqileqqinnissaanut piunassuseqas-sasoq ilimagaara."

A-p akissutaa imaattoq 10. juli 2007-imi tiguara:

"K Kommunimut saaffiginnittartuortaluarpunga D familiebehandlingimut aammalu-mi ...-mi oqaloqateqartalernissaa pillugit. Taamaakkaluartoq akineqanngisaannarpu-nga.

D ullumikkut imatut inissisimasalerpoq allaat:

Soqutigineqanngitsutut misigineq aammalumi sullinneqarusunngitsutut inissittarluni. Taamatut inisseqqaleraangat soorunalimi tuppallersartarpara "Qanoq iliuseqarnerar-lunga", paasitillugulu suliaq suli ingerlammat.

Suliarinerani ukioq ataaseq qaammatit arfineq marluk taamatut ingerlassimavara ilua-millu allakkatigut misilittagaqarnanga.

Allatuulli sanngiiffinni ingerlariaqqinnissanik nalorsaleraangama misigissutsikkut nakkaqqasarpunga. Tassa misigissutsikkut nakkaqqasarpunga arlaannaatigulluunniit tusagaqarneq ajorama K Kommunimiit. Tuppallersaatigisarpara D-p siunissaa pillugu qanoq iliuseqarama.

Saniatigut eqqaarusuppara aapparisara inooqatigisara D-mut qanoq iliuseqarusun-ngittoq. Naluara paqumigineraa imaluunniit nalorsaatigisarneraa. Aammalumi soorlu D K-meeqatigalugu assoroornartaqaaq pissutigalugu kinguaassiutimigut atonerluisima-soq takujuartaramiuk K. Soorunalimi annikillioartaqaaq, ersiortaqaq, nuanniillio-rtaqalunilu. Inuinnaagamalu misigissutsit tamakkorpassuit ilaannikkut nukissaaruffi-gisarlugit ilisimasakka annertunnginnamik.

Tuppallersaataaqaq suliamik soqutiginnillutit qanoq iliuseqarusunnerit, neriullunga illit pisussaaffiit malillugu ikiorluarumaaritsigut, meerarmi taanna peroriartorami i-maannaanngitsunik aqqusaagaqarsimasoq.

Sulilluarnissarnik kissaappakkit, paasisaqarusukkuut aamma sukkulluunniit paasiniaa-vigisinnaavarma (...)."

A-p allagai taakkuusut 31. juli 2007-imi aammattaaq tiguakka.

A 16. august 2007-imi imatut allaffigaara:

"Saaffiginnissutit, mailikkut 9. juli 2007-imi aamma allakkatigut 23. juli 2007-imeersutigut uannut nassiussatit, misissoreersimalerpakka.

Naammagittaalliuutinni aamma Naalagaaffiup Sinniisaanut (Rigsombudsmanden) allakkanni, Sinniisoqarfiup 11. april 2007-imi Inatsisartut Ombudsmandiannut ingerlateqqissimasaani, paasissutissiinerit naapertorlugu allakkannut 18. maj 2006-imeersunut, nunaqarfimmi kommunip immikkoortortaqarfianit nassiussimasannut, K Kommunip akissuteqarsimanginnera misissuiffiginarlugu aalajangerpunga.

Taamaattumik, allakkatigut assiliner ilanngullugu nassiunneqartutigut kommuni suliamut oqaaseqaateqarnissaa aamma suliami allagaatit misissugassanngorlugit atukiuteqqullugit qinnuigaara.

Kommunip akissutaa tigugukku suliaq uterfigeqqissavara.

D-p pisariaqartitai aallaavigalugit ilaqutariinnik katsorsaanissamik kommunip aallartitsisimanginnera pillugu naammagittaalliuutit pillugu oqaatigaara apeqqut taanna suliarisinaanagu, Isumaginninnermi Naammagittaalliuuteqartarfimmi aqutsinikkut inaarutaasumik apeqqummut tassunga aalajangiineq tiguneqarsimatinnagu. Tamanna Inatsisartut Ombudsmandiat pillugu Inatsisartut inatsisaanni § 6, imm. 3-mi, allakkanni 13. juni 2007-imeersuni ilinnut innersuussutigisimasanni, erserpoq.

Nangillugu oqaatigaara D-p ikiorserneqarsinnaannginnera pillugu, D-mit namminermit tassungaluunniit oqartussaasumit pisinnaatitsissummik saqqummiussaartinnak, kommunip Naammagittaalliuuteqartarfiulluunniit aalajangiinera pillugu naammagittaalliuutit suliarisinnaanngikkiga.

Taamaalilluni nalinginnaasuvoq Ombudsmandi naammagittaalliummut suliamik sukumiisumik misissuiffiginninnissappat inuup Ombudsmandimut naammagittaallior-tup aamma suliami illua'tungiuissaa imaluunniit illua'tungiusoq sinnerlugu iliuseqarnissaminut pisinnaatitsissummik peqassasoq piumasaqaataammat.

Tamatumunnga pissutaavoq Ombudsmandi misissuinerminut ataneqartumik oqartussaasumit, naammagittaalliummi pineqartumit, paasissutissanik isertuussassanik pisarsiniartarmat, aamma Ombudsmandip paasissutissat taakkua inuup suliami illua'tungiusutut isumaanik tusarniaassutitut naammagittaalliummut saqqummiuttarmagit, taamatuttaarlu Ombudsmandip suliamut inaarutaasumik oqaaseqaammini, naammagittaallior-tumut nassiunneqartussami, oqartussaasup pineqartup suliami allagaataasa ilai issuaavigisartussaammagit.

Ombudsmandi paasissutissat taamaattut, isertuunneqarnissaat pissutsit suussusiat pisutigalugit pisariaqartut, eqqarsaatigalugit Inatsisartut Ombudsmandiat pillugu Inatsisartut inatsisaanni § 8 naapertorlugu nipangiussisussaataavoq.

Taamaattumik Ombudsmandip suliami iliuusissat pisariaqartut iliuseqarfigisinnaanngilai, naammagittaallioraq suliami illua'tungiunngippat imaluunniit naammagittaallioraq sinnerlugu pisinnaatitsissummik tunniussaqaanngippat.

Tamatumunnga atatillugu ilisimatitsissutigisinnaavara Ombudsmandimut naammagittaalliuuteqarnissamut piunnaasaataannngimmat naammagittaallioraq namminersorsinnaassuseqarnissaa, kisiannili meeraq ukiukitsoq Ombudsmandimut naammagittaalliuuteqarsinnaavog pissutsini ukiukitsoq nammineq suliami illua'tungiuguni.

Aammattaq allakkannut, matumunnga peqatigitillugu Ilaqutariinnermut Pisortaqaarfimmumt nassiunneqartumut, assiliner ilanngullugu naassiunneqartumut, taakkunatigut Pisortaqaarfik ilisimatitsissutigigiga kommunip suliamik suliarinninnermini piffissaq atugaa pillugu naammagittaalliuutit suliariniariga, innersuussuteqassaanga.

Pisortaqaarfimmumt malugeqqusimavara Pisortaqaarfiup suliamik misissuinissaminik itigartitsinera eqqortuunersoq nalorninartuusoq isumaqarfigeqqaariga."

Ilaqutariinnermut Pisortaqaarfimmumt ulloq taanna allakkakka imaattunik oqaasertaqarput:

"A-mut 13. maj 2007-imeersunut allakkannut uiggiullugu, taakku pillugit pisortaqaarfik assilisanik nassillugu ilisimatitsissuteqarfigisannik, paasissutissiissutigisinnaavara maanna A-p naammagittaalliuutaa tigusalakku, aalajangerlungalu K Kommunip A-p allakkatigut saaffiginnissutaanut 18. maj 2006-imeersunut akissuteqarfigisimanninneranut tunngasoq aalajangersimasumik suliarilerniarlugu.

Tamatumunnga peqatigitillugu A siunnersorpara, Isumaginninnermi Naammagittaalliuuteqartarfik aqutsinikkut inaarutaasumik aalajangiitinnagu, tak. Ombudsmandi pillugu inatsimmi § 6, imm. 3, kommunip D-mut ikiorsiinissamut suliniummik aallartitissanersoq pillugu apeqqummut naammagittaalliuut suliarisinnaanagu.

Aammattaq isumaqarpunga pisortaqaarfiup suliamik suliarinninnianninnerminut tunngavilersuutigisaa, pisortaqaarfiup allakkatigut 23. maj 2007-imeersutigut uannut ilisimatitsissutai, siullertut isumaqatigisinnaanngikkiga oqaatigissallugu uannut pissutissaqalersitsippat.

Siullertut pineqartoq tassaavoq sulianik kommunit isumaginninnermi sulianut tunngasunik suliarinninnerat pillugu pisortaqaarfiup nakkutilliinera uanga paasinninnera mallillugu aamma sulianik suliarinninnermut apeqqutit nalinginnaasumik ingerlatsinnermi

6. Suliat nalinginnaasumik soqutiginaatillit, inatsiseqartitsiffiusunut agguataakkat

inatsiseqartitsinnermut malittarisassani iluarsiivigineqarsimasut, aamma pineqartut, matumanilu sulianik suliarinninnermut inatsit ilanngullugu eqqarsaatigalugu. Kommuni sulianik isumaginninnermut tunngasunik suliarinnikkaangat nalinginnaasumik ingerlatsinnermi inatsiseqartitsinnermi malittarisassat inatsisitigut tunngavinnut, kommunip aqutsinnermini maleruagassaanut aamma ilaapput, taamaattumillu isumaginninnermi malittarisassat ilaattut isiginiagassaallutik, taamaalillunilu ingerlatsinnermi inatsiseqartitsinikkut malittarisassat aalajangersimasut isumaginninnermi inatsimmi aamma nalinginnaasumik nassaassaasut ingerlatsinnermi inatsiseqartitsineq taakkunani pineqarlutik.

Tamatumunngalu peqatigitillugu pineqarpoq kommunit isumaginninnermi ingerlatsiviinik nakkutilliineq pisortaqarfiup Ombudsmandillu akornanni agguataarneqarsimanngitsoq.

Tamatumunnga pissutaavoq Ombudsmandi aqutsinikkut naammagittaalliorfissatut oqartussaasuunngimmat.

Taamaalilluni suliap Ombudsmandimit pisortaqarfimmilluunniit suliarineqarsinnaannginneranik kinguneqarsinnaavoq, taamatullu akerlianik pisoqarsinnaalluni, tassalu suliaq Ombudsmandimit pisortaqarfimmillu suliarineqarsinnaalluni.

Pisortaqarfiup Ombudsmandillu pisinnaasalittut naammagittaalliummik misissuinisami pisumi nakkutilliinissamat pisinnaatitaanerup iluarsiivigineqarnera Ombudsmandi pillugu inatsimmi § 6, imm. 3-mit ersepoq, tassani oqariartuutigineqarluni sulianik aqutsinikkut suliarinninneq, matumanilu aqutsinikkut nakkutilliinnermut oqartussaasumi sulianik suliarinnittarneq ilanngullugu eqqarsaatigalugu, nalinginnaasumik tunngaviusoq inaarlugu suliarineqarsimassasoq, nakkutilliinikkut aqqissuussa, soorlu Ombudsmandi, suliamik misissuilinginnerani.

Suliamut A-mut tunngasumut atatillugu pineqarpoq Isumaginninnermi Naammagittaalliuuteqartarfiup kukkunikkut suliamik Ombudsmandimut suliarisassanngorlugu nassiussisimannginnera, A-p Ombudsmandimut naammagittaalliuuteqarnissamik kisaateqarsimanagera ilisimatitsissutigeqqaarnagu.

Taamaattumik isumaqarsimavunga pissusissamisoortoq paasinarsassallugu. A Ombudsmandimut naammagittaalliorniarnersoq nammineeurlunga aperitinnagu, Ilaqutariinnermut Pisortaqarfiup suliaq suliariniarneraa.

Kisiannili pisortaqarfiup Ombudsmandi maanna nalunaarfigimmagu, suliaq pisortaqarfiup suliariniannigikkaa, tamatumalu malitsigisaanik A Ombudsmandimut naammagittaalliorat aalajangerpunga nammineq ilaa K Kommunip A-p allagaanut 18. maj 2006-imeersunut akissuteqannginneranut tunngasoq misissuiffiginiarlugu.

Tamanna tunngavigalugu pisortaqarfiup Ombudsmandimut allagaanut 23. maj 2007-imeersunut atatillugu annertunerusumik iliuuseqaqqissanngilanga."

Kommuni tusarniaavigigakku imatut qinnuigaara:

"(...) kommuni qinnuigaara allakkat taakku akineqarsimannginnerat pillugu naammagittaalliummut oqaaseqaateqaqqullugu. Ilanngullugu kommuni qinnuigaara suliami allaqqaakkat suliami allattuiffimmut ilanngunneqarfiat A-p 18. maj 2006-imeersut allagaasa misissornissaat pillugu nassiuteqaqqullugit."

K Kommunip akissutaa imaattoq 13. september 2007-imi tiguara:

"K Kommunip inunnik isumaginnittoqarfimmiit naammagittalliut tigusimavarput, imatullu akissuteqarfigerusullugu:

D (...).

Angajoqqaatut oqartussaasoq: A-p inooqataa (...).

D familiebehandlingimut kiisalu (...) -mi Ilaqutariinnut sullissivimmu (...) -mut oqaloqatigineqartalernissaanut A-p saaffiginnissutigisaa tunngavigalugu [nunaqarfi]mmut tikeraarluni angalanermi 2006-mi D angajoqqaatullu oqartussaassuseqartoq oqaloqatigineqarsimapput, K Kommunimi inunnik isumaginnittoqarfimmi suleqatigineqarnissaat pilersaarusoqatiginissaallu pillugit, piffissamilu taaneqartumi D-p ataataata inooqatigisimasaa A piffissami angalanerup nalaani illoqarfimmut allamut aallarsimammatt angajoqqaatut oqartussaassuseqartumut taamaallaat paasititsisinnaallutalu iliuuseqarsinnaagatta A suliap ingerlanerani paasitissimanngilarput, nipangiussimasusaatitaaneq tunngavigalugu taamaallaat ataataasumut attaveqarsinnaangatta.

Saaffiginnissutaasimasut aallaavigalugit ataataasorlu opfølgning [nunaqarfi]mmut tikeraarnermi ingerlatinneqartarsimapput, D-llu nammineerluni oqaloqatigineqartarnermigut kiisalu ataataasup ilisimatinneqarneratigut saaffiginnissutigineqartut akissuteqarfineqarsimapput naammagineqarlutillu, tassalu K Kommuni 2006 aallartilaartoq aningaasaliissutini tulleriarineq qinnuteqartullu malillugit familiebehandlingimut aningaasartuuteqarnissaminut pilersaaruteqarsimanngilaq saaffiginninnerup nalaani, tamannalu pineqartunit paasineqarsimavoq, aammalu ...-mi katsorsaavimmu utaqquisut amerlavallaarmata kommunitinniit pilersaaruteqarsimanngilangut meeqqanik inuusuttunillu ...-liartitsinissatsinnik, taamani kommunimi oqaloqatiginninnerit filialimilu ingerlanneqartassammata susassaarfiit, ass. atuarfik allallu, peqatigalugit ingerlanneqartassammata.

Suliaq D ataataalu peqatigalugit november 2006 naammassineqarsimavoq pineqartut peqatigalugit."

6. Suliat nalinginnaasumik soqutiginaatillit, inatsiseqartitsiffiusunut agguataakkat

Kommuni 10. oktober 2007-imi qinnuigaara itisilerisumik oqaaseqaateqaqqullugu, suliamilu allagaatit nassiunneqarnissaat tamatumunnga peqatigitillugu eqqaasitsissutigalugu:

"Kommunip tusarniaaninnut 16. august 2007-imeersumut akissutaa 13. september 2007-imi tiguara.

Kommunip akissutaa imatut paasivaara A-p saaffiginnissutaanik suliarinninnermini D-p ataataa angajoqqaatut oqartussaasusermik tigummiaqartoq kommunip attaveqarfigisimagaa, suliali suliarineqarnera kommunip nipangiussisussaataitanermin nassatarisaa-nik A-mut ilisimatitsissutigisimangikkaa.

Kommuni tamanna tunngavigalugu qinnuigaara manna pillugu ilassutaasumik nas-suiaateqaqqullugu, tassalu kommunip akissutaa imatut paasineqassanersoq A-p naam-magittaalliuutaata tiguneqarnera kommunip A-mut uppersarsimangikkaa A-lluun-niit naammagittaalliuutaata suliarineqalerneru kommunip A-mut ilisimatitsissutigisi-mangikkaa.

Kommuni tamatumunnga peqatigitillugu matumuuna eqqaasippara tusarniaaninni 16. august 2007-imeersumi kommunip suliaataa D-mut tunngasoq misissugassanngorlugu uannut nassiteqqullugu kommuni qinnuigigiga.

Kommunip ilassutaasumik nassuiaataa tigugukku mappilu allagaatinik A-mut tunnga-sunik imalik misissoreerukku suliami annertunerusumik iliuseqaqqissanerlunga isummerfigisinnaassallugu naatsorsuutigaara."

Kommuni akissuteqarnissaanik 18. december 2007-imi eqqaasippara.

Kommunip akissutaa imaattoq 18. februar 2008-mi tiguara:

"Matumuuna uppersarsarneqassaaq allakkasi 18.12.2007-imeersut maani tiguneqarsi-mammata 3. jan.2008.

Allakkani isertuni kommunaldirektørimut ingerlatinneqarsimasut maani tiguvagut marlungormat 5. februar 2008.

Maannakkullu akissuteqarfigissavagut allakkasi.

Piumasarineqartut tusarniaanermin allakkanit 16. august 2007-imeersut innersuullugit sagiata nassiunneqarnissaanik piumasaqartoqarneranut.

Ilanngullugu nassiunneqarput allakkat 12.9.2007-imeersut Ombudsmandimut. Ingerlatinneqaqqissimanngitsut. Sagiani uninngaannartut.

Ilanngullugu nassiunneqarpoq D-p sagiata assilinera.

Suliami allagaatinut tiguneqartunut ilaapput kommuni A-mut allagai 8. februar 2008-meersut:

“Pineqartoq D. [nunaqarfik], pillugu allagaqarsimanerit.

Matumuuna uppersarneqassaaq allakkatit Ombudsmandimut saaffiginnissutaasimasut assingi maani tiguneqarsimmata.

Saaffiginnissuternut qujalluta.”

Suliamik ingerlatsisoqarnissaanik allaffeeqqamut [nunaqarfi]mmut saaffiginnissutigineqareerpoq, maangaanniillu suliap ingerlalnissaa taamaalillugu naatsorsutigineqalerpoq.”

...-mi atuarfiup pisortaata ...-p saaffiginnissutaa 5. april 2008-meersaq imaattoq Isumaginninnermi Naammagittaalliuuteqartarfik aqputigalugu 28. april 2008-mi tiguara:

"Pineqartoq: D, inuusq ...

Eqikkaaneq:

D sisamat missaannik ukioqarluni atonerlugaasimavoq. Arfineq pingasut missaannik ukioqarluni tamanna ilinniartitsisuminut oqaluttuaraa. Ilinniartitsisup suliaq pimoorusimangilaa. D-p atonerlunneqarsimanini anaansiaminut oqaluttuaraa. Anaansiaa kommuni immikkoortartaqarfiani allaffimmi sulivoq, suliarlu ingerlateqqissimangu. D qulingilat missaannik ukioqarluni ilinniartitsisuminut allamut misileeqqippoq, taassumalu suliaq uannut oqaluttuaraa. Tamatuma kingorna K Kommunimi isumaginnittoqarfik kommunaldirektørilu allaffigaakka, akissuteqarfigineqanngitsunik. Allakkat 50-it missaanniittut pineqarput, ajoraluartumillu maanna qarasaasiami aserornikumiillutik. Peqqissaasoq aqputigalugu ... Napparsimmaviat kiisalu PPR ...-miittoq akuliutsillugit kommuni attaveqarfiginiarsarigaluarpara. Piffissap ingerlanerani tunarsimaariartorpunga. Suliaq 2004-mi qaqqileqqippara, PPR-ip kaammattuineratigut, taamani PPR-ip B Kommuni sumiginnaasutut nalunaarutiginiugaa. Tamanna aqputigalugu periarfissaqartoq eqqarsarpunga, PPR-ilu ...-miittoq suleqatigilerlugu. Inatsisartut Ombudsmandiat akuliutsinniarsimagaluarpara, K Kommunimulli saaffiginnissutigisartagarisimasama arlaannaalluunniit uppersarsinnaannginnakku naatsorsuutigisimavara Inatsisartut Ombudsmandiata soqutiginnilerniarneranik misiliinarneq

6. *Suliat nalinginnaasumik soqutiginaatillit, inatsiseqartitsiffiusunut agguataakkat*

iluqaataanaviangitsoq. Suliaq PPR-ip eqqartuussissuserisuanut tunniunnissaa siunertaralugu K Kommunimut maanna saaffiginnissuteqarlunga misiliivunga saaffiginnissutigisarsimasama assilineri piniarlugit. Oqaasiinnartigut paasitinneqarpunga D pillugu allagarisarsimasama arlaannaalluunniit K Kommunimit pigineqangitsoq.

Isumaginninnermik ingerlatsivimmit aallartitamit nunaqarfik pingasoriarlugu tikeraarneqartarpoq, tamatigulli suliamik suliarinninneq oqaasiinnartigut ingerlanneqartarpoq.

Tikeraarnermi siullermi isumaginnittoqarfimmit (maanna kommunaldirektøriusumik inuttaqarallarmat) suliaq pillugu iserfiginiarnera pillugu siunertarisama qulaajarneqarnissaa ulapputigisimavaat. Aperineqarpunga: "Niviarsiaaraq tiguniarakku?"

Isumaginnittoqarfiup aappassaannik tikeraarmatigut suleqataasoq (...) neriorsuivoq tassa maanna arlaannik pisoqassaqqartoq.

Pingajussaannik isumaginninnermi siunnersortip atuarfik angerlarsimaffillu pularpai uangalu ataatsimeeqatigalunga. Tassani aamma imaqarniliortoqanngilaq, katsorsaanissamilli neriorsuisoqarluni.

Sisamassaannik isumaginnittoqarfimmit aallartitaq aggerluni nalunaaruteqaqqaaranilu D angerlarsimaffianit arsaarinnissutigalugu ima oqarluni "... taamaattoqartariaqarpoq atuarfimmi naalassinnaannginnavit!"

Tamatuma kingornatigut atuarfimmi pisortatut tunuarternipunga K Kommunimilu isumaginnittoqarfiup sutigut tamatigut suleqatiginera unitsillugu. Taamaattorli annertusisamik nalunaarutiginnittussaataitanera eqqortinniarpara; sulialli uanga malitseqartitsivigissanngilakka. Meeqqat sulii innarleqqinnissaat siunertaqanngimmat.

Ilanngullugit nassiunneqartut:

10. dec. 2006: A

25. april 2004: Isumaginninnermik ingerlatsiviup pisortaa, K Kommuni

7. september 2004: Isumaginninnermik ingerlatsivik, K Kommuni

26. november 2004: Isumaginninnermik ingerlatsivik, K Kommuni

26. november 2004: Naalakkersuisunut ilaasortaq Asii Chemnitz Narup

1. december 2004: Isumaginninnermik ingerlatsivik, K Kommuni

3. december 2004: Isumaginninnermik ingerlatsivik, K Kommuni

13. december 2004: Isumaginninnermik ingerlatsivik, K Kommuni

Ullulerneqangitsoq: Isumaginninnermik ingerlatsivik, K Kommuni

13. maj 2005: Isumaginninnermik ingerlatsivik, K Kommuni" (Atorfeqarfimmi nut-sigaavoq)

Allakkat taakku atuarfimmit 27. maj 2007-mi tigoqqippakka, assammik allalluni "Ombudsmandip saaffiginnissutaanut akissut"-mik nalunaarneqarsimasut.

Atuarfik 7. juli 2008-mi imatut akivara:

"(...)

Atuarfiup allagaasa sumik siunertaqarnerat imaaliannaq paasisinnaanngilara, tassa-mi naammagittaalliummut atatillugu kommunimi isumaginninnermik ingerlatsiviup tusarniaanermut akissutaanik 18. februar 2008-mi tigusaqarama. Naammagittaalliuut tassaavoq innuttaasup D pillugu kommunimut allakkatigut saaffiginnissutaata kommu-nimit akineqarsimannginnera pillugu saaffiginnissut.

Atuarfiup Ombudsmandimut allagai naammagittaalliuutitullu suliaq suliarisara im-minnut attuumassuteqarsorinanngillat.

Tulliullugu oqaatigaara atuarfiup Ombudsmandimut allagai atuarfiup pisortaanit at-siorneqarsimasut atuarfiup D pillugu saaffiginnissutaanut kommunimi isumaginnin-nermik ingerlatsiviup qisuariarsimannginnera pillugu naammagittaalliummik imaqartut.

Meeqqanik inuusuttunillu ikiorsiisarneq pillugu Inatsisartut peqqussutaanni § 5-imi imm. 2-kkut ilaatigut aalajangersarneqarpoq atuarfimmi sulisut meeqqap ikiortariaqar-neranik paasisaqarunik kommunalbestyrelsimut ilisimatitsinissaminut annertusisa-mik pisussaaffeqartut.

Taamaalilluni pisussaaffik taanna atuarfiup pisortaata inuinnartut pisussaaffiginngilaa, suliamulli ilaatillugu pisussaaffinnut ilaalluni.

Atuarfik atuarfiulluunniit pisortaa isumaqarpat kommunalbestyrelsi meeqqanik inuu-suttunillu ikiorsiisarneq pillugu Inatsisartut peqqussutaanni § 5, imm. 2 tunngavi-galugu qisuariangitsoq, taava uanga paasinninnera unaavoq atuarfiup ingerlatsineq pillugu inatsiseqartitsineq tunngavigalugu pisussaaffigigaa naammaginangitsumik qisuariarneq taamaattoq isumaginninnermik nakkutilliinermi oqartussaasumut, tassalu Naalackersuisunut (Ilaqutariinnermut Peqqissutsimullu Naalackersuisoqarfimmut) nalunaarutigissallugu, tak. isumaginnittoqarfiup aqunneqarnera aaqqissuussaaneralu pillugit Inatsisartut peqqussutaanni § 1, imm. 1.

Ombudsmandip pisortat ingerlatsiviannut ilaangitsup ingerlatsinermi oqartussaasut akornanni imaluunniit ingerlatsiviup iluani aaqqiagiinngissutinik aaqqiiniaqataanissaq aallaavittut suliasarinngilaa.

6. *Suliat nalinginnaasumik soqutiginaatillit, inatsiseqartitsiffiusunut agguataakkat*

Taamaattumik atuarfiup saaffiginnissutaa Ombudsmandip naammagittaalliuutitut suliarissallugu imaaliallaannaq tunngavissaqanngilaq.

Atuarfik tamanna tunngavigalugu qinnuigaara atuarfik suli isumaqarpat atuarfiup D pillugu saaffiginnissutaasa kommunalbestyrelsimit suliarineqarnera isornartorsiuner-mut pissutaasariaqartoq, tamanna Ilaqutariinnermut Peqqissutsimullu Naalakkersui-soqarfimmut nalunaarutigeqqullugu.

Taamaattorli atuarfik nakkutilliinermi oqartussaasumut akisussaasumut saaffiginnik-kaluartoq tamanna naammaginngitsumik inernilerneqarpat atuarfik Ombudsmandi-mut saaffiginneqqinnissaminut tikilluaqqusaavoq, taamaaliortoqarpallu nakkutilliiner-mi oqartussaasup kommunilluunniit suliamik suliarinninnera nammineeirluni misis-suiffigisariaqarnerlugu Ombudsmandip isummerfigissavaa.

Atuarfiup Ombudsmandimut saaffiginnissutaanut atatillugu paasissutissat pigineqartut tunngavigalugit annertunerusumik iliuuseqaqqissanngilanga."

A-mut ulloq taanna imatut allappunga:

"Suliaq K Kommunimut tusarniaaninnik tamatumalu kingornatigut kommunimut 18. december 2007-imi nukingisaarininnik ilinnut 10. oktober 2007-imi ilisimatitsissuti-gisara massakkut uterfigaara.

K Kommunip suliami akissutaa 18. februar 2008-mi tiguara.

Kommunip akissutaanit ilaatigut makku erserput:

"D Familiebehandlingimut kiisalu ...-mi ilaqutariinnik sullissivimmi ...-mi oqaloqa-tigineqartalernissaanut A-p saaffiginnissutigisaa tunngavigalugu [nunaqarfi]mmut tikeraarluni angalanermi 2006-imi D angajoqqaatullu oqartussaassuseqartoq oqa-loqatigineqarsimapput, K Kommunimi inummik isumaginnittoqarfimmi suleqatigi-neqarnissaat pilersaarusoqatigineqarnissaallu pillugit, piffissamilu taaneqartumi D-p ataataata inooqatigisimasaa A piffissami angalanerup nalaani illoqarfimmut alla-mut aallarsimammat angajoqqaatut oqartussaassuseqartumut taamaallaat paasitit-sisinnaallutalu iliuuseqarsinnaangatta A suliap ingerlanerani paasitissinnaanngilar-put, nipangiussisussaataaneq tunngavigalugu taamaallaat ataataasumut attaveqar-sinnaagatta."

Tamatumunnga atatillugu qinnuigaakkit kommunip allakkanut 18. maj 2006-imeersu-nut D-mut angajoqqaatut oqartussaassuseqartoq peqatigalugu illit atsiorsimasannut akissuteqarsimanninneranik nassuiaataa pillugu oqaaseqaatissaqarnerisutit nalunaar-figeqqullunga.

Kommunip akissutaa pillugu oqaaseqaatissaqaruit qinnuigineqarputit oqaaseqaatit uannut sapaatit akunneri arfinillit qaangiutsinnagit nassiuteqqullugit.

Tusarfiginngikkukkit Ombudsmandip suliamik paasissutissat pigineqartut tunngavigalugit inaarsaalluni suliarinninnissaa naatsorsuutigisariaqarpat."

A-p akissutaa imaattoq 13. august 2008-mi tiguara:

"Siullermik qujavunga allakkanut.

Naqqiuteqalaassuunga D-p angutaanut ...-mut suli inooqataagama, inooqatikuunanga.

Saaffiginnissuterpullu ilaqutariit akornatsinni ataatsimut aaliangiunneqarsimalluni, imatut paasillugu: Angajoqqaatut oqartussaasoq ...-p kiisalu meeqqap pineqartup D-p aaliangernerisigut saaffiginninneq aallartissimalluni.

Ajuusaarnartua uaniippoq, saaffiginninnerup aallartinneraniit ukiut pingasut qaangiupput sulilu saaffiginnissuterput naammassineqarnani. K Kommunimi suliaq kigaalasi-maqaq sulisullu paarlakaannerujussuannik paatsuungasoqartannguatsiarluni.

Ilanngullugu ilisimatitsissutigissuara inooqatima tassa angajoqqaatut oqartussaasup ...-p angalajuarnini pissutigalugu, pisinnaatitsissut uannut tunniussimallugu. Ajuusaarnarpoq tamanna allaganngorlugu ingerlatissimanningsigu.

Soorunami ilaqutariittut saaffiginnissut tamatta malinnaavigaarput, suliaq qanoq ingerlanersoq eqqartorneqartarpoq ilaqutariit akornatsinni, meeqqamut oqilisaaniaqataagatta akisussaasuugatta.

Naggataatigut ilisimatitsissugissuarput meeraq pineqartoq D ukioq manna atuarfiusoq aallarnerfigalugu ...-mi ukiut atuarfissani kingulliit ingerlatissammagit."

A-mut 30. januar 2009-mi imatut allappunga:

"Suliaq K Kommunip tusarniaanermut akissutaa 7. juli 2008-meersoq pillugu oqaaseqaatinnik 12. august 2008-mi saqqummiussiffigisat massakkut uterfigaara.

Piffissaq sivisooq misissueqqilernissama tungaanut ingerlasimasoq siullertut ajuusaarutigaa. Atorfeqarfiup ininut nutaanut 2008-mi augustip qaammataani nutsernera, qarasaasiami ingerlatseriaatsimik nutaamik 2008-mi septemberip qaammataani atulersitsineq sulisullu arlallit 2008-mi ukiap ingerlanerani soraarnerat Atorfeqarfiup sulianik suliarinninneranut kinguarsaaqataasimapput.

6. *Suliat nalinginnaasumik soqutiginaatillit, inatsiseqartitsiffiusunut agguataakkat*

Misissuinerali naammassingajalerpara, tamatumunngalu atatillugu suliami allagaatit ilinnit aamma K Kommunimit tigusakka tamarmiusut misissoqqippakka.

Misissuininni malugaara K Kommuni 28. august 2006-imi allaffigisimagit, D-llu ilaqutariinnik katsorsaannermi ilaatinneqarnissaa qinnuteqaatigisimagit. Kommunip allakkanut taakkununga akissutaa suliami allagaatinut ilaangilaq.

Taamaattumik allakkatit 28. august 2006-imeersut akineqarsimanersut, allakkallu akineqarsimangippata tamatumunnga pissutaasoq pillugu nassuiaateqaqqullugu K2³² Kommuni qinnuiginiarlugu aalajangerpunga.

K2 Kommunimut allakkama assilinerat ilanngullugu nassiuppara.

K2 Kommunip akissutaa tigugukku suliamik misissuina inaarsarsinnaassallugu naatsorsuutigaara."

K2 Kommunimut ulloq taanna allakkakka imaattunik oqaasertaqarput:

"Suliami allagaatinik A-mit tigusannik misissuininnik inaarsaalerninnut atatillugu malugaara A-p K Kommunimi isumaginninnermik ingerlatsivimmumt allagai 28. august 2006-imeersut ilaasut, D-llu ilaqutariinnik katsorsaannermi ilaatinneqarnissaa A-p K Kommunimut allakkatigut taakkunuuna qinnuteqaatigisimagaa.

Allakkat taakkua assilinerat allakkallu Atorfeqarfimmit qallunaatumut nutserneqarnerat ilanngullugit nassiuppakka.

Allakkat 28. august 2006-imeersut akineqarsimanersut allagaatini K Kommunimut 18. februar 2008-mi tigusanni takusinnaangilara.

Kommuni qinnuigaara A allakkat kingullertut taaneqartut pillugit akineqarsimanersoq paasissutissiissutigeqqullugu, taamaangippallu kommuni qinnuigaara allakkat akineqarsimanginnerannut pissutaasoq pillugu nassuiaateqaqqullugu."

Kommuni akissuteqarnissaanik 12. maj 2009-mi aamma 7. juli 2009-mi eqqaasippara.

Kommunip 20. juli 2009-mi imatut akivaanga:

"Qulaani pineqartumut tunngasut paasissutissat ingerlatinneqarput. D-p (inuttut normua) ataataata ...- aappaata A-p qinnuteqaannikuuvaa pisariaqartitsinera tunngavigalugu familiebehandlingsinnaanersoq, imaluunniit ...-mukarsinnaanersoq.

32) Kommunit kattutsinneqarnerisigut kommuninngortoq.

Qinnuteqaat tunngavigalugu [nunaqarfi]mmut angalasoqarnera tunngavigalugu paa-siniaaffigineqarput, angajoqqaatut oqartussaasuseqartumut. Nassuiaassutigineqarluni-lu aningaasat killeqarnerat tunngavigalugu tullerriaassisoqartoq, aammalu ... ulikkaaq-qammat tullerriaattunut ilanngunneqartoq, tamannalu tunngavigalugu paasilluarneqar-poq.

Akissut A-p naammaginngimmagu naammagittaalliuut ingerlalersimasoq pillugu paa-sissutissat ingerlatinneqarput."

A-mut 8. november 2009-mi imatut allappunga:

"Suliaq tusarniaaninnut 30. januar 2009-meersumut K2 Kommunimut nukingisaaruti-ga pillugu 7. juli 2009-mi ilinnut kingullermik ilisimatitsissuteqarfigisara massakkut uterfigaara.

D-p ilaqutariinnik katsorsaanermi katsorsarneqarnissaanik qinnuteqaatinnut 28. august 2006-imeersunut malitseqartitsiviginninnermik apeqqutiga kommunip 22. juli 2009-mi akivaa.

Kommunip akissutaani oqaatigineqarpoq suliaq K Kommunip (immaqalu K2 Kommu-nip) D-mut angajoqqaatut oqartussaasuseqartoq eqqarsaatigalugu suliarisimagaa. Tamanna imatut paassivara saaffiginnissutitit kommunip akisimanngikkai.

Suliami K Kommunimut saaffiginnissutinnut akissuteqarfigineqartarsimanersutit a-peqqummut tunngasumi tamatuma kingornatigut oqaaseqaateqarsinnaanerluni Om-budsmandip isumaliutersuutigaa, tak. ilinnut allakkakka 16. august 2007-imeersut.

Malugaarali uannut allakkanni kingullerni 12. august 2008-meersuni oqaatigisimagit D-mut ikiorsiiniutinik aallartitseqqullutit kommunimut saaffiginnissutinnik K Kom-munip suliarinninnera pillugu Ombudsmandimut naammagittaalliornissannut A-p i-nooqataanit (D-mut angajoqqaatut oqartussaasuseqarnermik tigummissaqartumit) pi-ginnaatitsissummik peqartutit.

A-p inooqataata allakkatigut piginnaatitsissutaa nassiussinnaagukku Ombudsmandi misissuineri saaffiginnissutivit kommunimit suliarineqarnerannik isummerfigine-qarnerannillu misissuineri aamma annertusisinneqarnissaanut piareersimajumavoq, pingaartumik kommuni Isumaginninnermi Naammagittaalliuuteqartarfimmit suliarineqartariaqartunik aalajangiisimanersoq qulaajarniarlugu.

A-p inooqataata piginnaatitsissutaanik ullumikkumiit sapaatit akunnerisa arfineq pi-ngasut qaangiunneranni tigusaqanngikkuma manna piareersimaffigisariaqarpat, tassa-lu kommuni saaffiginnissutinnut akissuteqarnissaminut ingerlatsineq pillugu inatsise-qartitsineq tunngavigalugu pisussaaffimminik eqqortitsisimanersoq kisiat Ombuds-

6. Suliat nalinginnaasumik soqutiginaatillit, inatsiseqartitsiffiusunut agguataakkat

mandi oqaaseqaateqarfigissagaa, saaffiginnissutitilli aqutsinermi oqartussaasunit inerlugit suliarineqarsimasutut isigineqarsinnaanersut Ombudsmandip isummerfigissanngikkaa."

A-p inooqataa uannut 17. november 2009-mi imatut allappoq:

"Uanga ateqarpunga ... (inuttut normu), matumuunalu uppersaavunga uanga A una pillugu D, (inuttut normua), suliakkersimallugu.

Taamatut naatsunnguamik uppersaallunga."

Tamatuma kingornatigut imaattunik oqaaseqaateqarpunga:

"1. Misissuinerma killissalersorneqarnera

Uanga misissuininna A-p inooqataatalu allagaannik 18. maj 2006-imeersunik K Kommunip suliarinnissimanera D-llu ilaqutariinnik katsorsaanermi ilaatinneqarnerata aallartinneqarnissaanik A-p qinnuteqaataanik 28. august 2006-imeersumik kommunip suliarinnissimanera ilaatinneqarput, mannami uanga tunngaviutikkakku, tassalu Ombudsmandimut naammagittaalliornissamut piffissaliussaq 16. april 2007, tassa A-p allagaannik 13. februar 2007-imeersunik Naalagaaffiup Sinniisaanik tigusaqarfigisara A-llu Ombudsmandimut naammagittaalliorumanerminik e-mailikkut 9. juli 2007-imeersukkut uppersaateqarfigisaa eqqarsaatigalugit naatsorsorneqassasoq.

Suliaq A-p inooqataa sinnerlugu naammagittaalliuutitut tuniunneqarsimasutut A-p inooqataata piginnaatitsissutaa tigoreerlugu tamatumunnga atatillugu misissorpara.

Isumaginninnermi Naammagittaalliuuteqartarfiup suliamik suliarinninnera eqqarsaatigalugu kommuni Naammagittaalliuuteqartarfimmu naammagittaalliuutigineqarsinnaasumik aalajangiisimanersoq naliliivunga. Uanga paa-sinninnera unaavoq taamaattoqartoq, tak. immikkoortumi 3.2-mi oqaaseqaatikka, taamaattumillu Naammagittaalliuuteqartarfik suliap suliarineqarnissaa itigartitsinissaminut tunngavissaqarsimanngitsoq. Suliap suliarineqarnissaa itigartitsissutigineqassanersoq Naammagittaalliuuteqartarfiup misissuinerara isornartorsuinermit pissutissaqalersitsisinnanersoq naliliiffiginninneq misissuinermit matumunnga killissarititaasut avataanniippoq.

Ilaqutariinnermut Pisortaqarfiup suliamik nakkutilliinnermi oqartussaasutut misissuiffiginnikkumanninnera eqqarsaatigalugu pisortaqarfimmu tassunga allakkanni 16. august 2007-imeersuni oqaaseqaatikka innersuussutigaakka, allakkanilu taakkunanani ilaatigut malugeqqullugu oqaatigaara pisortaqarfiup su-

liamik misissuinissaminut tunngavissaqarani pisorta qarfiup oqarnera isumaqatiginngikkiga.

2. A-p inooqataata aamma A-p allagaannik 18. maj 2006-imeersumik K Kommunip suliarinninnera

Allakkat taakku kommunimut qinnuteqaatinik tigussaasunik imaqanngillat, Dlli tapersorsorneqarnissamik pisariaqartitsineranik allaaserinninnermik imaqarlutik.

Tusarniaanermut akissutit 13. september 2007-imi aamma 20. juli 2009-mi tigusakka imatut paasivakka K Kommuni allakkat taakku tunngavigalugit tigussaasunik suliniuteqarsimangitsoq, A-llu allagaasa 28. august 2006-imeersut tigueqarnerisa kingornatigut kommunip suliaq aatsaat suliarilersimagaa.

Oqaatigaara meeqqanik inuusuttunillu ikiorsiisarneq pillugu Inatsisartut peqqussutaat (Inatsisartut peqqussutaat nr. 1, 15. april 2003-meersoq kingusinnerusukkut allannguuteqartinneqarsimasoq) § 6, imm. 1-imi aalajangersakkamik imaattumik imaqartoq:

"Kommunalbestyrelsi meeqqamik immikkut tapersorsortarialimmik paasisaqaruni, ilanngullugu timikkut eqqarsartaatsikkullu pisinnaasakillisisimaneq pissutigalugu, pissutsit misissorneqarnissaat kommunalbestyrelsip isumagissavaa."

Misissuineq qaqugukkut aallartinneqartassanersoq aalajangersakkami tassani taannaluunniit piareersarlugu suliani oqaatigineqanngilaq.

Inatsisartulli peqqussutaat pillugu oqaaseqaatinit nalinginnaasunit makku er-serput:

"Pisariaqartitsineq aallaavigalugu ikiorsiinissaq meeqqanik inuusuttunillu ikiorsii-sarnermi tunngavigineqartalissaaq, taamaalilluni qanorpiaq suliniuteqarnissamut aalajangiisuussallutik meeqqap/inuusuttup pisariaqartitai, maannamut tunngavigineqartartoq ilaqutariit ataatsimut pisariaqartitai kisimik isiginiarneqarunnaassallutik. Taamaattumik meeqqap pisariaqartitavii peqqussummi sammineqarput. Kinguneriligassaa tassaavoq ilaqutariinni meerartalinni isumaginninnikkut ajornartorsiutit siusissukkut iliuuseqarfigineqarsinnaalerlutillu iliuuseqarfigineqartussanngussammata. Siusissukkut iliuuseqarnermi ajornartorsiutit meeqqamut inuusuttumulluunniit annertusivallaannginnissaat periarfissinneqassaaq, aammalu ajornartorsiutit annertunerulernatillu artornarsivallaannginnissaat periarfissinneqassallu-ni.

Siusissukkut akuliunneq aamma pinngitsoorani iliuusissanik pilersarusiornissaq ilaqutariinni meerartalinni ajornartorsiutit annertusiartuinnarnissaannik pinaveersaartitseqataassaaq, peqatigisaanillu assersuutigalugu meeqqamik katsorsaanissaq

6. Suliat nalinginnaasumik soqutiginaatillit, inatsiseqartitsiffiusunut agguataakkat

siunertaralugu inissiinissamik pisariaqartitsinerit annikillisissallugit. Taamaattumik angerlarsimaffimmi suliuiniutinut, inissiinermi siunertaq erseqqissarlugu, aamma inissiinerup atorunnaarnerani (suliniutit atorunnaarneranni malinnaaneq) iliuussissanik pilersaarusiornissaq pillugu aalajangersakkat siunnersuutigineqarput, taamaalilluni meeqqap inuusuttulluunniit siunissaa isumagineqartussanngorlugu."

Kommunip ikiorsiiniutaanik aallartitsisoqarnissaa qanoq pisariaqartinneqartigisoq A-p inooqataata aamma A-p kommunimut saaffiginnissutaata takutippaa, D-llu inuttut annertuunik ajornartorsiuteqartoq allakkat taakku tamatumunnga peqatigitillugu takutillugu.

Uanga tamanna tunngavigalugu paasinninnera unaavoq ikiorsiiniutinik aallartitsisoqarnissaanik annertuumik pisariaqartitsisoqarnersoq K Kommuni allakkat 18. maj 2006-imeersut pissutigalugit ingerlaannaq misissuinissaminut pisussaaffeqarsimasoq.

Taamaattumik uanga paasinninnera unaavoq K Kommuni A-p inooqataata aamma A-p saaffiginnissutaannut imaaliallaannaq qisuariarfiginninnginnermigut pisussaaffinnik kommunip meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu pisussaaffigisaanik isorisarialerujussuarmik sumiginnaasimasoq.

3. A-p allagaanik 28. august 2006-imeersumik D-p ilaqutariinnik katsorsaanermi peqataatinneqarnissaanik qinnuteqarfigisaanik K Kommunip suliarinninnera

3.1 Suliami illua'tungiusup sinniisoqarneranik apeqqu

K Kommunip tusarniaanermut akissutaa 13. september 2007-imi tigusara aallaavigalugu uanga paasinninnera unaavoq kommuni A eqqarsaatigalugu suliami aalajangiisimanngitsoq, tassami kommunip paasinninnera unaammatt A suliami illua'tungiunngitsoq.

Isummap taassuma isornartorsiuinissannut pissutissaqalersissinnaanngilaa nga.

Tamatumunngali peqatigitillugu pineqartoq tassaavoq A-p inooqataata aamma A-p D pillugu ataatsimoorlutik saaffiginnissutaat 18. maj 2006-imeersoq kommunip oqaatigineqartutut tigusimagaa.

Uanga paasinninnera unaavoq tamatuma immi A inooqamminut imaluunniit immaqa D-mut suliami illua'tungiusumut sinniissutut iliuuseqarnersoq kommu-

*ni erseqqinnerusumik misissuinissaanut pissutissaqalersissimasariaqaralua-
raa.*

*Suliassat suliarineqartarnerat pillugu inatsimmi § 8 imaattunik oqaasertaqar-
poq:*

*"§ 8. Suliame (illuatungiulluni) peqataasoq suliassap suliarineqarnerani sukkulluun-
niit sinniisoqartissinnaavoq ikiorneqartissinnaalluniluunniit. Oqartussaasulli piu-
masarisinnaavaat peqataasup taassuma nammineq najuunnissaa, tamanna suliassap
aalajangiiffiginissaanut pingaaruteqarpat.*

*Imm. 2. Imm. 1-imi oqaaseqatigiinni siullerni aalajangersagaq atortuussanngilaq
peqataasup sinniisoqartitaasinnaannissaminik ikiorteqartitaasinnaannissaminilluun-
niit soqutiginninnera pisortat inuinnaalluunniit soqutigisaat pissutiginerullugit min-
nerutittariaqartut isumaqarfignarpat, imaluunniit inatsisitigut allamik aalaja-
ngersagaqareerpat."*

*Suliame illua'tungiusutut sinniisoqarsinnaatitaaneq innuttaasut inatsiseqar-
titsinikkut innarlitsaalineqarnissaannik siunertaqarpoq, ataatsimullu tunnga-
vimmu Nunani Avannarlerni ingerlatsineq pillugu inatsisiliornermi akuerisaa-
sumut takussutissaalluni, tak. Justitsministereqarfiup Danmarkimi ingerlatsi-
neq pillugu inatsisissatut siunnersuut pillugu oqaaseqaatai imaattut (FT 1985-
1986, Till. A, sp. 130 tulliillu):*

*"Inatsisissatut siunnersuummi kapitali 3 aalajangersakkat pillugit oqaaseqaatit i-
ngerlatsineq oqartussaasut ingerlatsiviup suliame suliarinninnerani innuttaasup
suliame sinniisoqarsinnaatitaanerannik imaluunniit allanik ikiorneqarsinnaatita-
nerannik innuttaasunut ilitsersuinissaannik imaqartut suliap suliarineqarnerani pe-
qataasinnaatitaannginneq pillugu malittarisassat assigalugit inatsisini atuuttuni as-
seqanngillat.*

*Ingerlatsinermi ileqqorissaarneq pillugu malittarisassat nassatarereerpaat, soorlu
tamanna Ombudsmandip periaasiani ilaatigut oqaatigineqartoq, ingerlatsinermi
oqartussaasut inunnik oqartussaasunut saaffiginnittunik ilitsersuinissaminut aala-
jangersimasumik annertussusilimmik pissusaaffeqarnerat. Tamatuma pissuseqataa-
tut malittarisassatut nalinginnaasutut atuuppoq pisortat ingerlatsivianni suliame su-
liarineqartumi illua'tungiusoq suliap suliarineqarnerani nalinginnaasumik ikiorne-
qarsinnaatitaasoq sinniisoqarsinnaatitaasorluunniit.*

*Ukiuni kingullermi manna pingaartillugu isiginiarneqaleriartorpoq, tassalu innut-
taasut pisinnaatitaaffi pissusaaffilu pisortani oqartussaasut innuttaasunut ilisima-*

6. Suliat nalinginnaasumik soqutiginaatillit, inatsiseqartitsiffiusunut agguataakkat

titsissutigissagaat, oqartussaasullu innuttaasunik pisariaqarneratut annertutigisumik kiffartuussissasut.

Ingerlatsineq pillugu ataatsimut inatsimmi ingerlatsinermi oqartussaasut innuttaasunik ilitersuinissaminnik pisussaaffeqarnerat pillugu aalajangersakkamik erseqqissumik ilanngussinissaq tamanna tunngavigalugu qanippoq. Inatsiseqartitsineq pillugu ataatsimiititaliap inatsisissatut siunnersuummik Folкетинip kingullermi ataatsimiinnerani suliarinninnerani qulaani taaneqartutut imm. I a-p ataani oqaatigineqarpoq ilitersuisarneq aamma sinniisoqartarneq pillugu malittarisassanik erseqqissunik ingerlatsineq pillugu inatsimmi ilanngussisoqartariaqartoq, Finlandimi Norgemilu ingerlatsineq pillugu inatsisit atuuttut aamma Sverigemi ingerlatsineq pillugu inatsisissatut nutaatut siunnersuummut missingiutip pissuseqataannik. Taamaattumik tamanna pillugu malittarisassat Justitsministereqarfiup inatsisissatut siunnersuummi saqqummiussaani ilanngunneqarput." (Atorfeqarfimmi nutsigaa-voq)

Taamaattumik oqartussaasup qinnuteqaammik innuttaasumit suliami illua'tungiuunngitsumit tigusaqartup qinnuteqartoq suliami illua'tungiusumut sinniisuunersoq pisariaqarneratut annertutigisumik misissortariaqarpaa. Sinniisuunermut tunngasut uppernarsaaseqqunissaannut periarfissaq misissuinnermi tassani pissutsit qanoq ittuunerat apeqqutaatillugu ilaavoq.

Tamanna tunngavigalugu isumaqarpunga A inooqamminut (imaluunniit D-mut) suliami illua'tungiusumut sinniisuunersoq misissuiffiginninnginnermigut K Kommuni isorisarialimmik kukkussuteqarsimasoq.

Uanga paasinninnera unaavoq kukkuneq taanna suliap ingerlaqqinneranut sunnuteqarsinnaasimasoq, tassami ilaqutariinnik katsorsaanermi peqataatitsineq pillugu apeqqut kommunip paasissutissiissutigineqartut malillugit nunaqarfimmut tikeraarnermini A-p inooqataanut aatsaat oqaloqatiginnissutigisimammagu.

A suliami illua'tungiusumut sinniisuusoq kommunip akuerisimasuuguniuk taassuma qinnuteqaataa allakkatigut aalajangiivigissallugu suliassat suliarineqartarnerat pillugu inatsimmi tunngavilersuisarneq aamma naammagittaalliornissamut periarfissamik ilitersuisussaataaneq pillugit malittarisassat tunngavigalugit pisussaaffeqarsimassagalarpoq, taamaalillunilu erseqqissumik takuneqarsinnaassalluni kommuni Isumaginninnermi Naammagittaalliuuteqartarfimmut naammagittaalliuutigineqarsinnaasumik aalajangiisimasoq.

Aamma oqaatigaara kommunip A-mut allagai 8. februar 2008-meersut taassuma qinnuteqaataata tiguneqarneranik uppernarsaataasut A eqqarsaatigalugu naammattumik suliarinninnerunngitsut, A suliassat suliarineqartarnerat pil-

lugu inatsimmi suliami illua'tungiusumut sinniisuusarneq pillugu malittarisas-
sanik eqqortitsisimappat.

3.2 D ataataalu eqqarsaatigalugit suliamik suliarinninneq pillugu apeqqu

D-p ilaqutariinnik katsorsaannermi peqataatinneqarnissaanik apeqqu K Kom-
munimi isumaginninnermik ingerlatsiviup [nunaqarfi]mmi 2006-imi piffissami
erseqqinnerusumik oqaatigineqanngitsumi tikeraarnerani A-p inooqataanut
oqaatigineqartutut oqaloqatiginnissutigisimavaa. K Kommunip tusarniaaner-
mut akissutaanit erserpoq kommunip A-p inooqataa attaveqarfigisimagaa, A-p
ilaqutariinnik katsorsaannermut peqataatitsinissamik qinnuteqaataa pissuti-
galugu.

Tusarniaannermut akissutit tiguneqartut aallaavigalugit makku tunngaviutip-
pakka, tassalu D-p ilaqutariinnik katsorsaannermut peqataatinneqarnissaa K
Kommunip piareersarsimagaa, kommunilli A-p inooqataanut oqaatigisimagaa
ilaqutariinnik katsorsaannermut peqataatitsineq kommunip neqeroorutigini-
ngikkaa, tamannalu kommunip aningaasaataasa atornerarnerannik tulleriiaa-
rinnermik katsorsaavimmilu pineqartumi katsorsartinnissamut utaqqisut allat-
torsimaffianni utaqqisoqarneranik pissuteqartoq.

Kommunip katsorsaannermut peqataatitsinermut taarsiullugu D ataataalu nam-
mineq oqaloqatigisimavai.

Tamatuma kingornatigut apeqqutaalersoq tassaavoq K Kommunip ilaqutariin-
nik katsorsaannermut peqataatitsiniarnani oqarsimanera aalajangiinerunersoq
Isumaginninnermi Naammagittaalliuteqartarfimmut naammagittaalliutigi-
neqarsinnaasoq.

Oqaatigaara meeqqanik inuusuttunillu ikiorsiisarneq pillugu Inatsisartut peq-
qussutaanni aalajangersaakkat uku naliliinernut tassunga attuumassuteqartut:

§ 6, imm. 1:

"Kommunalbestyrelsi meeqqamik immikkut tapersersortarialimmik paasisaqaruni,
ilangullugu timikkut eqqarsartaatsikkullu pisinnaasakillisimaneq pissutigalugu,
pissutsit misissorneqarnissaat kommunalbestyrelsip isumagissavaa."

§ 7, imm. 1:

"Misissuinermi paasisat isummertoqarnissaanut atornerqassapput, suliniutinik aal-
lartitsinissaq tunngavissaqarnerasoq taamaappallu suliniutit suut inassutigineqassa-
nersut."

§ 9:

"Imm. 1. Angajoqqaatut oqartussaassuseqartoq aamma meeraq 15-ileereersimasoq akuersiseqqaarlugit ikiorsiissutissaq meeqqap immikkut pisariaqartitsineranut naleqqunnerpaaq kommunalbestyrelsip toqqassavaa.

Imm. 2. Kommunalbestyrelsi assersuutigalugu aalajangersinnaavoq

1) meeqqamut pissutsinut tunngatillugu isumaginninnermi sullissinikkut ikiorsiinissamik,

2) meeraq ulluunerani neqeroorutini, inuusuttut klubbianni, ilinniartitaanermut assigisaanniluunniit peqataassasoq,

3) illup iluani, perorsaanermik imaluunniit allatut angerlarsimaffimmi tapersersuinikkut ikiorsiinissamik,

4) ilaqutariinnik katsorsaanissamik assigisaanilluunniit tapersersuinissamik,

5) meeqqamut, angajoqqaatut oqartussaassuseqartumut aamma ilaqutariinni ilaasunut allanut ulloq unnuarlu paaqqinniffimmi, angajoqqaarsiani assigisaanniluunniit ulloq unnuarlu inissiinissamik neqerooruteqarnissamik,

6) ulloq unnuarlu paaqqinniffimmi, angajoqqaarsiani taakkualuunniit assigisaanni oqilisaassinertut inissiinissamik neqerooruteqarnissamik,

7) meeqqap angerlarsimaffiup avataanut inissinneqarneranut atatillugu angajoqqaatut oqartussaassuseqartup tapersersorteqarnissaanik neqerooruteqarnissamik,

8) inuttut siunnersuisorisamik neqerooruteqarnissamik, tak. § 16,

9) ineqarfiutigalugu atuarfimiinnermut efterskolemiinnermulluunniit aningaasatigut ikiorsiinissamik, tamatumunnga angajoqqaatut oqartussaassuseqartoq nammineerluni akissaqanngippat,

10) meeqqap angerlarsimaffiup avataanut inissinneqarnissaanik, assersuutigalugu ulloq unnuarlu paaqqinniffimmut imaluunniit angajoqqaarsianut, meeqqap immikkut pisariaqartitsineranut naammassinnissinnaasutut isigineqartumut imaluunniit,

11) suliniuteqareernerme malinnaanissamik.

Imm. 3. Kommunalbestyrelsi aalajangersinnaavoq suliniutit imm. 2-mi taakkartorneqartut malitsigisaannik aningaasartuutitut ikiorsiinissamik, taakkununga angajoqqaatut oqartussaassuseqartoq nammineerluni akissaqarsimangippat."

§ 39:

"§ 6, imm. 3, §§ 9-10, § 17, § 29 aamma § 38 malillugit aalajangiinerit isumaginnittoqarfiup aqunneqarnera aqqissuussaanageralu pillugit Inatsisartut peqqussutaanni aalajangersakkat tunngavigalugit Isumaginninnermut Naammagittaalliuuteqartarfimmur naammagittaalliuutigineqarsinnaapput."

Naammagittaalliornissamut periarfissaq isumaginnittoqarfiup aqunneqarnera aqqissuussaanageralu pillugit Inatsisartut peqqussutaanni nr. 11-mi, 12. november 2001-imeersumi § 8, imm. 1-ikkut imatut allaaserineqarpoq:

"Isumaginninnermi malittarisassat naapertorlugit kommunalbestyrelsi aalajangiisimatillugu suliamut attuumassuteqartup aalajangiineq Isumaginninnermi Naammagittaalliuuteqartarfimmur naammagittaalliuutiginnaavaa. Aalajangiinerup figuneranit sapaatip akunneri sisamat qaangiutsinnagit Isumaginninnermi Naammagittaalliuuteqartarfimmur naammagittaalliuuteqartoqassaaq."

Isumaginnittoqarfiup aqunneqarnera aqqissuussaanageralu pillugit Inatsisartut peqqussutaanni naammagittaalliortarneq pillugu ataatsimut malittarisassat meeqqanik inuusuttunillu ikiorsiisarneq pillugu Inatsisartut peqqussutaanni innersuussutigineqartut taamaalillutik oqaatigaat naammagittaalliornissamut periarfissaq aalajangiinernut tunngasuusoq, isumaginnittoqarfiullu aqunneqarnera aqqissuussaanageralu pillugit Inatsisartut peqqussutaat piareersarlugu suliani matuma ilimaginissanut tunngavissaqanngitsaq, tassalu aalajangiinnermik oqartarneq ingerlatsineq pillugu inatsiseqartitsinnermi aalajangiinnermik oqartarnermi pineqartunut ilaatinneqartunit allaasoq pineqartoq.

Tamatununga peqatigitillugu meeqqanik inuusuttunillu ikiorsiisarneq pillugu Inatsisartut peqqussutissaattut nr. 1-itut, 15. april 2003-meersutut siunnersuut pillugit oqaaseqaatini nalinginnaasuni ilaatigut makku oqaatigineqarput:

"Inatsisinut allanut attuumassuteqarneq

(...)

Pisortat ingerlatsineranni suliassat suliarineqartarnerat pillugu inatsit:

6. Suliat nalinginnaasumik soqutiginaatillit, inatsiseqartitsiffiusunut agguataakkat

*Siunnersuummi suliaasat suliarineqarnissaannik aalajangersakkanut pisortat ingerlatsineranni suliaasat suliarineqartarnerat pillugu inatsit, ilitersuineq, allagaatinik suliaasamut tunngasunik ilisimatinneqarnissaq, oqaaseqartussaataaneq aamma suliamik attuumassuteqartumik tusarniaasarneq il.il. pillugit aalajangersakkanik erseqqissunik imaqartoq soorunami tapertaassaaq. Sulianik ingerlatsisup pisortat ingerlatsineranni suliaasat suliarineqartarnerat pillugu inatsimmik suliap ingerlane-
ra tamaat qimerluuisarnissaa aammalu suliaasanik suliarinninnermini immikkut malittarisassat paragraffini ataasiakkaani nassuiarneqartut ilannguttarnissai pingaaruteqarluinnarpoq."*

Meeqqanik inuusuttunillu ikiorsiisarneq pillugu Inatsisartut peqqussutaanni taamaalliluni tunngavigineqarpoq sulianik Inatsisartut peqqussutaanni tassani pineqartunut ilaatinneqartunik suliarinninnermut ilaatillugu ingerlatsineq pillugu inatsiseqartitsineq tunngavigalugu aalajangiisoqartassasoq.

Taamaattumik uanga paasinninnera unaavoq kommuni meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu "aalajangiisimasoq", Isumaginninnermi Naammagittaalliuuteqartarfimmuut naammagittaalliuutigineqarsinnaasumik, aalajangiineq taanna ingerlatsineq pillugu inatsiseqartitsineq tunngavigalugu aalajangiinermik oqartarnermi pineqartunut ilaatinneqarpat.

Ilaqutariinnik katsorsaannermut ilaatitsinninnissamik K Kommunip aalajangiinera eqqarsaatigalugu tamatuma kingornatigut oqaatigaara aalajangiineq taanna D meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu ikiorneqarnissamik pisariaqartitsisoq kommunip isummersimaneranut takussutissaasoq, kommunilu aalajangersimasoq pineqartup ataataatalu oqaloqatigineqarnerisigut ikiorsiisoqassasoq.

Kommuni taamaaliornermigut D-p imaluunniit ataataata Isumaginninnermi Naammagittaalliuuteqartarfimmuut naammagittaalliuutigisinnaasaannik aalajangiisimanersoq naliliininni siullertut pingaartillugu isiginiarpara kommunip ikiorsiiniuteqartoqarnissaannik isummerfiginninnera pingaarnerusutigut isigalugu meeqqamut imaluunniit meeqqap angajoqqaavinut sullissisimanermut takussutissaasoq.

Taamaattumik kommunip ikiorsiinnigilluinnarnissaannik aalajangerneq, tak. meeqqanik inuusuttunillu ikiorsiisarneq pillugu Inatsisartut peqqussutaanni § 7, imm. 1, meeraq angajoqqaavilu eqqarsaatigalugit ingerlatsineq pillugu inatsiseqartitsinerami aalajangiinermik oqartarneq tunngavigalugu qularutissaanngitsumik aalajangiineruvoq.

Meeqqanik inuusuttunillu ikiorsiisarneq pillugu Inatsisartut peqqussutaanni ikiorsiissut sorleq § 9-mi periarfissat (ikiorsiiniutilluunniit allat) akornanni

kommunit atussaneraat apeqqummi ikiorsiiniut sorleq meeqqap immikkut pisariaqartitaanut naapertuunnerpaanersoq aalajangiisuvoq, tak. § 9, imm. 1.

Uanga paasinninnera aammattaaq unaavoq meeqqanik inuusuttunillu ikiorsiisarneq pillugu Inatsisartut peqqussutaanni § 9, imm. 1-ip § 7-imut ataneqarluni manna nassatarigaa, tassalu ikiorsiiniummik aalajangersimasumik ikiorsiisoqarnissaanik qinnuteqaateqartoqarsimanersoq apeqqutaatinnagu ikiorsiiniutip sorliup toqqarnissaa isumaliutersuutigissallugu kommunip pisussaaffigigaa.

Qinnuteqaatip sunniutigeqqaagaa tassaavoq pisumi pineqartumi qinnutigineqartoq itigartitsissutigineqarpat aalajangiinerup taassuma qinnuteqartoq inulluunniit qinnuteqaammik pineqartoq eqqarsaatigalugu aalajangiinerunera, aamma tak. A-p qinnuteqaataa pillugu 3.1-imi oqaaseqaatikka.

Meeqqanilli inuusuttunillu ikiorsiisarneq pillugu Inatsisartut peqqussutaat kisiat isigalugu takuneqarsinnaanngilaq ikiorseeriaatsimik aalajangersimasumik toqqaaneq ikiorseeriaatsinillu allanik toqqaannginneq ingerlatsineq pillugu inatsiseqartitsineq tunngavigalugu aalajangiinerunersut.

Tamatumani aalajangiisuusoq tassaavoq aalajangiinerup innuttaasunut eqqorneqartunut³³, pisumi matumani D-mut ataataanullu, pingaaruteqassusianik naliliineq.

K Kommunip D-mut ikiorsiinissamik apeqqummik isummerfiginninnera imatut aamma paasisariaqarakku kommuni naliliisimasoq ikiorsiiniut naleqquttoq tassaasoq D-mik ataataanillu oqaloqatiginninnerit, kommunip isummernerata manna imaaliallaannaq nassataraa, tassalu kommuni tamatumunnga peqatigitillugu aalajangersimasoq ilaqutariinnik katsorsaanermut peqataatitsiniarani imaluunniit ikiorseriaatsinik meeqqanik inuusuttunillu ikiorsiisarneq pillugu Inatsisartut peqqussutaanni § 9, imm. 2-mi taagorneqartunik ikiorsiiniarani.

Taamaattumik uanga paasinninnera unaavoq D eqqarsaatigalugu aalajangiineq ima sunniuteqartigisoq, taanna pineqartoq eqqarsaatigalugu ingerlatsineq pillugu inatsiseqartitsineq tunngavigalugu aalajangiinertut isigineqartariaqartoq. Aalajangiineq taanna aamma A-p inooqataa eqqarsaatigalugu aalajangiinerunersoq apeqqummi ilaqutariinnik katsorsaanermut peqataatitsinis-

33) Hans Gammeltoft-Hansen allallu, "Forvaltningsret", aappassaanik 2002-mi naqiter-titaq, quppernerit 36 tulliilu.

samik isumaliutersuutiginninnermi A-p inooqataa aamma ilaatinneqassanersoq apeqqutaavoq.

Tamanna tunngavigalugu isumaqarpunga K Kommuni D-p taassumaluunniit nakkutilliisuata Isumaginninnermi Naammagittaalliuuteqartarfimmut naammagittaalliuutiginnaasaannik aalajangiisimasoq.

Tamatamani kommuni allakkatigut tunngavilersuutitalimmik naammagittaalliornissamullu periarfissaqarneranik ilitersuutitalimmik aalajangiisariaqarsimagaluarnersoq isummerfiginngilara, isumaqarpungali manna ajuusaarnartumik kukkunerusoq, tassalu kommunip pisumi matumanisut ittumi A-p inooqataata panini pillugu allakkatigut kommunimut siusinnerusukkut saaffiginnisuteqarfignissamaani, ilaqutariinnillu katsorsaannermut peqataatitsinissamik (A-mit) allakkatigut qinnuteqaat tunngavigalugu aalajangiiffiusumi naammagittaalliornissamut periarfissat aamma allakkatigut aalajangiisogarnissaanik piumasaqaateqarsinnaanermik, tak. suliassat suliarineqartarnerat pillugu inatsimmi § 23, A-p inooqataanut ilitersuisimannginera.

D ataataalu Isumaginninnermi Naammagittaalliuuteqartarfimmit naammagittaalliornissamut periarfissaqarneranik ilitersorneqarsimanngimmata K Kommunip ilaqutariinnik katsorsaannermut peqataatitsinissamik (allatulluunniit ikiorsiisogarnissaanik) itigartitsissutiginnissimanagera Isumaginninnermi Naammagittaalliuuteqartarfimmut suli naammagittaalliuutiginneqarsinnaavoq, tassami pisumi tassani naammagittaalliornissamut piffissaliussa q suli ingerlalersimanngimmat.

K Kommunilli ilaatigut aningaasaqarnermut tunngasut pissutigalugit D ilaqutariinnik katsorsaannermut peqataatinneqarnissamik neqeroorfigineqassanngitsoq A-p inooqataanut nalunaaruteqarneranik piffissaq ingerlasimasoq isiginiarlugu suliaq Naammagittaalliuuteqartarfimmut uanga nammineq nassiuutinngilara. A-mulli inooqamminut suliame illua'tungiusumut sinniisuusumut allakkatigut allatigut allakkat ukua assilinerinik ilaqartinneqartutigit ilisimatit-sissutigaara naammagittaalliornissamut periarfissaq suli atuuttoq, D ilaqutariinnik katsorsaannermut peqataatinneqarnissamik meeqqanik inuusuttunillu ikiorsiisarneq pillugu Inatsisartut peqqussutaata killissarititaasa iluanni suli pisariaqartitsippat, naammagittaalliornissamullu periarfissami ikiorsiiniummik toqqaaneq aamma kommunip aalajangiinnermini aningaasaqarnermut tunngasunik isiginninniarsimanagera ilaatinneqartut.

4. K Kommunip suliamek uppersaasersuinnera

Suliaq pillugu paasisutissani kommunip uannut nassiuussimasaani kommunip ikiorsiiniutit pillugit apeqqummik D-nik aamma ataataanik oqaloqatiginnissi-

maneri pillugit suliamik kommunip misissuisimanera pillugu uppernarsaatiniq nassaarsinnaasimangilanga.

Oqaatigaara suliat paasissutissartalersorneqarnerat K Kommunip akisussaaffigigaa, taamaattumillu suliap ingerlasimanerata illersorneqarsinnaasumik uppernarsaasorsorneqarneranut allakkatigut tunngaviit qulakkeerneqarnissaat kommunip ingerlatsinermi ileqqorissaarneq pillugu nalinginnaasumik tunngaviit tunngavigalugit pisussaaffigisimagaa.

Tamatuma saniatigut allattuisussaataaneq pisortat ingerlatsinerannik paasitineqarsinnaatitaaneq pillugu inatsimmi § 6, imm. 1-ikkut aalajangersarneqarpoq:

"Suliassani ingerlatsinermut oqartussaasunit aalajangiiffigineqartussani oqartusaaq paasissutissanik suliassamut tunngassuteqarluinnartumik suliassap aalajangiiffigineqarnissaanut pingaaruteqartunik oqaasiinnakkut pissarsisoq, paasissutissanilluunniit taamaattunik allatut iliorluni paasisaqartoq paasissutissat taakku imaat pillugit allakkiussaaq. Taamaattorli paasissutissat taakku suliassap allakkiartaasa ilaanni takuneqarsinnaappata tamanna atuutinngilaq."

Kommunip D-mik ataataanillu oqaloqatiginninnerisa imarisaannik allattuinsaminut K Kommunip aalajangersagaq taanna tunngavigalugu pisussaaffeqarsimavoq.

Meeqqanik inuusuttunillu ikiorsiisarneq pillugu Inatsisartut peqqussutaanni tamatuma saniatigut § 7-imi qulaani issuakkanni tunngavigineqarpoq suliamik suliarinninnerup ilaa angajoqqaat meeqqallu ikiorsiiniutigineqarniartut pillugit isummerannut tunngasoq allakkatigut ingerlanneqassasoq, tassami paasissutissat taakku pillugit inassuteqaat kommunip suliarisussaammagu.

Tamatuma kingornatigut isumaqarpunga K Kommunip aamma K2 Kommunip suliap ingerlasimanera pillugu uppernarsaatiniq sukumiisunik peqannginnerat isorisariaqartuusoq.

5. A-p naammagittaalliuutaa tunngavigalugu uanga misissuinera

Suliamik uanga misissuinera 17. november 2009-p tungaanut A-p allagai 28. august 2006-imeersut K Kommunip akisimanerai apeqqummut killiligaavoq.

Misissuinerma kommunip meeqqanik inuusuttunillu ikiorsiisarneq pillugu Inatsisartut peqqussutaat tunngavigalugu suliarinninneranik ilaatitsilinnginninnut pissutaavoq allakkani A-mit 10. juli 2007-imi aamma 31. juli 2007-imi tigusan-

6. Suliat nalinginnaasumik soqutiginaatillit, inatsiseqartitsiffiusunut agguataakkat

ni suliamik allaaserinninninni issuakkanni takuneqarsinnaammat A-p inooqataata suliamut akuliunnissani kissaatiginngikkaa.

Taamaalillunga A-p piffissami tamatuma nalaani inooqamminut suliami illua'tungiusumut sinniisaasutut isiginissaanut pissutissaqarsimangilanga.

Oqaaseqaatimali ukioq manna siusinnerusukkut inaarlugu suliarineqarsinnaasimanginnera ajuusaarutigaara.

(...)"